

Nunatta Qitornai

Inatsisartuni



01.april 2020

IIA2020/18

**Uunga siunnersuut: Nappaatit tunillaassortut akiorniarlugit iliuutsit pillugit
Inatsisartut peqqussutaata allanngortinneqarnera pillugu Inatsisartut inatsisissaat nr.xx, xx.xxx-imeersoq**

(Tunillaassuinerup pinaveersaartinniarnernani siaruarnaveersaartinniarnernanilu aamma sullissiniarnermi pisariaqartitat il.il. qulakkeerniarneranni iliuuseqartoqarsinnaanermut annertusaaneq)

Naalakkersuisut kissaateqarput Kalaallit Nunatsinni pisut ilungersunartorujussuarmik inissisima-soqarnera peqqutigalugu ullumikkut Inatsisartut immikkut ittumik inatsisissamik suliaqaqqulluta ataatsimiissasugut.

Siullermik Naalakkersuisut nersualaaqqaarumavagut sulilluarnerninut. Nualluussuup tuniluuttut nu-narsuarmioqatigiinnut ilungersunartumik atugaqartitsisup Nunatsinnut apuunnerani akisussaaffim-mik kusanartumik tigusernerinut aammalu innuttaasunut qanimut suleqateqarlutik toqqissisimanis-samut siuttuunertik takutimassuk. Sulilluarnernisa kingunerisaanik qujanartumik maannamut ajor-nerusumik atugaqanngilagut. Qujanaq akisussaaffik tamatta sinnerluta kusanartumik tunnisuimal-lusilu ingerlatsinissinnut minnerunngitsumillu peqqinnissaqarfimmi sulisorpassuit allallu inui-aqatigiit unittuunngilluinnarnissaannik tunniusimallutik ulloq unnuarlu sullittunut qujaniarnerput apuukkusupparput.

Pissutsit takorlooreersimasinnaanngisavut ullutsinni atuupput, maani nunarsuarlu tamakkerlugu. Inuiassuit tupaqqavugut, ernumavugut aammalu inuiassuit napparsimarrapput. Inuiassuit akorn-anni nualluussuup nassatarisaanik inuppasuit toqorarput, inuppasuit perulupput aammalu in-uppassuit ullut tamaasa sulii aattorneqarput.

Ernumanartut pinngitsoorniarlugit nualluussuullu corona virusip covid 19-ip siaruattaalineqarnis-saanut suliniarnermi tamakkiisumik uagut suleqataassugut tunuliaqutaassugullu.

Nualluussuaq parteeqaranilu qalipaateqanngilaq kisiannili nunarsuarmioqatigiit tamarmik ataatsi-moorluta akiorniassallugu sulissuugut immitsinnut ilinniarfigaluta aammalu immitsinnut isigaluta periutsit iluattittut aammalu periutsit iluatsinngitsut ilinniarfigalutigit.

Inatsisartutigit inatsisit akuerineqarsimasut martsip 16-ata kingorna, tassalu Nunatsinni covid-19-imut tunillatsissimasoq siulleq pasitsaanneqarneranit ersersinneqarpoq inatsisit atuutereersut akiuiniarnermi naammangitsut, tamanna aamma soorlu Danmarkimi takugipput Folketingimilu aamma immikkut inatsisissamik suliaqartariaqarneranik akuersisariaqarneranillu kinguneqartoq.

Nunatta Qitornai

Inatsisartuni



Naalakkersuisut folketingimi issatsiannguaq inatsisissaq akuersissutigineqartoq annertuumik tunngavigaat, tupinnangitsumik.

Qujanartumik innuttaasut pisortat inassuteqaataat peqqussutaallu malippaat taamaasilluni mianersornerup nassatarisaanik nualluussuup siaruatsaalineqarnerani suleqataallutik. Toqqissisimanarpoq nuannaajallannarlunilu pisariaqarfiani uagut kalaallit qanoq ataatsimuullaqqitsiginerput immitsinnullu qanoq illersullaqqitsiginerput takullugu. Tuppalliutiginnitsugassaangilaq sanngiinnerusortatsinnut illersuimalluta qanoq annertutigisumik inuttut pilliuteqarsinnaaneq inuiaqatitsinni takullugu.

Taamaakkaluartoq inoqarpoq peqqussutinik innersuussinernillu malinninnissaminnik peqqutissaqanngitsutut misigisimasunik iliuuseqartunillu. Taakkua mianersugaalliornerisa kingunerisaanik inuit allat tunillatsinnaanerini aammalu ulorianartorsiortissinnaanerini inissisimatitsipput. Taakkua pissusilersornerisa toqqissisimannginneq angisooq nassataritittarpaat aammalu pisariaqanngitsumik pinngitsoortinneqarsinnaasumillu tunillaassuunneq pilersissinnaavaat. Tamanna pinngitsoortinniarlugu sukaterineq pisariaqartoq paasilluarparput iliuuseqarniarnermilu tunuliqutaanerput nalunaarutigaarput.

Inatsisissatigut sukaterineq pisariaqarpoq. Inatsisissatigut inuiaqatigiit aqqissugaanitsinni nukittunerusumik illersorsinnaasumillu inissisimanissarput pisariaqarpoq. Inatsisissatigut tamat oqartussaaqataanerata aqqani inuit illersorneqarnissaat pisariaqarpoq. Inatsisissatigut tunngaviusumik inatsiseqarnerup inuit illersorneqarnerat ataqqineqarluni sinaakkuteqarnissamik qulakkeerinninissaq pisariaqarpoq. Inatsisissatigut inuiaqatigiinni unamminartoq akiorneqarniarnerini sakkussat pisariaqartut qulakkeerneqarnerisigut toqqissisimaneq atuutsitsiniarnermilu nalorninnginnissaq qulakkeerneqarnissaq pisariaqarpoq.

Ulluni makkunani inuit pisinnaatitaaffii tungavigalugit isummersoneq tusaavarput, aamma taamaattussaavoq. Inatsisiliornerit tamarmik inuit pisinnaatitaaffiinik illersuisumik aammalu uniungitsumik ingerlatsinissami pisussaaffik pioreerpoq. Inuit illersorumallugit inuillu inatsisitigut illersorneqartumik tunngaveqartumik inatsiseqarnissaq qitiuvoq, tamannalu Naalakkersuisut aamma sulinerminni qitiutippaat.

Inuiaqatigiittut aqqissugaanitsinni tunngaviusumik inatsimmik tunngaveqartumik ingerlatsinitsinni sinaakkutissat tamarmik taassuma iluani pisut piginnaatitsissutip namminerisamik takutippaa. Pissaanerup aggulunneqarnera aammalu atuutsinneqarnera tunngavigalugu ingerlatsineq toqqissisimanartoq illersugaraarput, tunaartaraarput siunnerfigaarpullu.

Nunatta Qitornai

Inatsisartuni



Nualluussuup akiorniarneqarnerani qaatusimasumik, toqqissimasumik, peqataatitsiffiusumik, qaammarsaaviumik, mianersortumik, akisussaaqataaffiusumik siaruatsaaliqataaffiusumillu inatsisitigut patajaatsumik paatsuuganangitsumillu tunngaveqarluni ingerlanissatsinnut Naalakkersuisut innersuussaqarnerini tamakkuusumik tunuliaqutaanerput erseqqissarusupparput.

Inuiaqatigiinni sanngiinnerusortavut, utoqqartavut nunaqqativullu tamaasa illersorumallugit sullitortavut sakkusaaq inatsisitigut atugassaatigut tunuliaqutserpavut.

Inatsisissat uuma atuuttup taartissaanik Naalakkersuisut suliaqalersaarnerat ilassilluarparput. Inatsisissatut siunnersuummi atuuffissaanut siunniussarinqartoq ullulernerqarsimasoq isumaqarpugut uniffiginagu Tunillaassortumik Nappaalanersuaqarnermut Ataatsimiititaliarsuup mianersoqqusinerata aammalu ulorianartumiikkunnaanerput nalunaarutigineqarnissaata tungaanut atuutissasoq isumaqarpugut, taakuummatami sinaakkusiisut inuiaqatigiinni qanoq iliuseqarnissatsinnut aammalu peqqussutai innuttaasunit malinneqarnissaannik innersuussaqartuusut. Soorunami siumooreersumik ilisimangilarput nualluussuup qanoq sivistigisumik tuniluussinnaanera piunersoq taammaamat siumooreersumik aamma ulluleereersinnaangitsugut isumaqarpugut. Minnerpaamik Naalakkersuisut inatsisissap nutaassap piareerluni akuersissutigineqarnissaata tungaanut inatsisissaq atuutissasoq isumaqarpugut.

Inuiaqatigiit ataqqineqarlutik, angerlarsimaffii ataqqineqarlutik, nunap peqqussutai ataqqineqarlutik, ikioqatigiiffiusumik peqataatitsiffiusumillu nualluussuup akiorniarneqarnerani inatsisitigut sakkusatigut tunuliaqutsiivugut.

Inatsisit tunngaviusut innarlernagit sinaakkutigaluguli ingerlaneq pissaaq.

Inatsisip atuutilersussap allanngortariaqarnerani, misilittakkat katersorneqarnerani inatsisissap taarsiissutaajumaartussamut mianerisassat misilittakkallu ilaatinneqarnissaanut eqqummaarit-toqarnissaanik kaammattuivugut.

Taamatut oqaaseqarluta Naalakkersuisutsinnut sulinerminnut kusanartumut ingerlariaqqinnissaanut tunuliaqutsiivugut oqaatigineqartullu nalunaarusiornermini aamma ataqqillugit ingerlariaqqinnissaannik kissallugit.